

## I Ragguagli di l'Università

N° 40  
Nuembre di u 2006

Cuntattu :  
Romain Colonna  
romaincolonna@hotmail.com



**Sabrina CASABIANCA**  
3<sup>a</sup> annata di Scienze

# A Certificazione di Lingua corsa

U 26 d'ottobre di u 2006

# Lingua corsa

L'università è u Centru Culturale Universitariu ci anu prupostu fine d'ottobre, u 26, una ghjurnata cunsacrata à a lingua corsa. Ci ne era di tutte e mamme : riporti, dibattiti, pezza di tiatru è ci era quella rimessa di a Certificazione di lingua corsa.

Quelli chì ùn ci eranu micca si dumandanu aghjà di ciò chì si tratta parlandu di una certificazione di lingua corsa ? Pà capisce bè, femu ci calchì passu in daretu : l'Università hà messu in ballu à a riintrata di u 2005 una certificazione chì assicura di modu ufficiale e cumpitene scritte è urale di quellu chì a si franca à tutte e prove. A l'aspittavamu dipoi un pezzu ! Eccu la quì ! Nanzu à e vacanze d'istatina si passavanu e prime prove. U caldu ùn hè riiscitu à guastà a vuluntà chjuccuta di i candidati. Eranu pà issu prima annu una bella cinquantina à prinsintà si, vinianu da tutti l'UFR, da tutte e filiere. Ùn era faciule micca pà i nostri candidati chì u livellu era bellu altu, B2 nantu à a griglia aurupea di e cumpitene linguistiche, vene à di **bislinguu** cù cumpitene scritte è urale fine ! Ma sò stati quantunque trenta à riesce.

Tandu a cumunità universitaria hà prufittatu di issa ghjurnata cunsacrata à a lingua corsa pà filicità li è rimette li di modu sulenne i so certificati. Issa bella stonda era suvitata da un appiritivu. Trà dui chjocchi di bichjeri Audrey Ruggeri, Nicolas Antona è Sabrina Casabianca ci anu palisatu i so sintimi di pettu à a so riescita.



**Nicolas Antona**  
2<sup>a</sup> annata di Geniu Civile, IUT

I nostri trè studenti speranu chì issu certificatu novu l'aiutarà à riesce megliu una vita prufizionale.

*Sabrina* brama una ricunniscenza à livellu suciale è economicu, pà chere un impiegu par asempiu. *Nicolas* pensa chì a lingua corsa deve sparghe si antu à u tarrenu publicu è tandu ch'ella deve esse valorizata u più pussibile.

È *Audrey* hè cuntenta di dì ch'ella pudarà aghjustà à u so C.V. a so cumpitene di cursofona.



**Audrey RUGGERI**  
1<sup>a</sup> annata di Master-Lettere

Issu 26 d'ottobre hè duvintatu un ghjornu impurtante pà a lingua corsa chì li hè cuncessu un stuvigliu suciale novu, ma dinò pà i studenti chì oramai pudaranu fà valè di modu ufficiale una cumpitene chì sinu à avà era pocu ricunnisciuta.

Torna à filicità li !